

Ils purs d'avegnan tgraders da la cuntrada

Cun la midada da la politica agrara 2014–2017 vegnan ils pajaments directs pajads ora sin in'austra moda ed uschia vegnan auters puncts accentuads che fin ussa. I vegn per exempel a dar pli paucs pajaments directs per ils animals, dentant dapli per la biodiversitad e la qualitad da la cuntrada. Per ils pajaments per la tgrada da la cuntrada, ch'ils purs survegnan davent dal 2014, han els da far diversas lavurs. Quellas vegnan coordinadas en projects. Responsabels per quels projects èn las uniuns purilas regionalas.

Tar las lavurs vai per tgrar chaglias, l'ur dal gaud, mirs sitgs, palis ed uschia vinavant. Quai na saja betg mo impurtant per il maletg da la cuntrada, ma bain era per la biodiversitad. Cun questa tgrada saja pli simpel per utschels, filiens e bliers auters animals da survivor. Il chantun Gri-

schun haja tenor *Hansjörg Hassler*, president da l'uniun da purs grischuna, ina cuntrada cultivada multifara e quai saja surtut per il turissem da grond'impurtanza. Per mantegnair quella, gioghian ils purs in'impurtanta rolla. Ils purs sajan s'arranschads cun questa rolla.

A l'entschatta eri ina tscherta sceptica d'enturn, era perquai ch'i n'era anc betg dal tut clar, tge che midia tut. Surtut tar ils purs cun tratga da biestga intensiva, quels che la nova politica agrara tucca pli fitg. Tuttina saja la situaziun cun la nova politica agrara tenor Hansjörg Hassler buna. Quai era, perquai ch'il Grischun saja stà in dals quatter chantuns, nua ch'i ha dà projects da pilot. Il Grischun ha pia schon pudì rimnar experientschas cun la tgrada da la cuntrada e vegn cun la nova politica agrara a survegnir dapli pajaments.



Cun la politica agrara 2014–2017 survegnan ils purs dapli pajaments per la biodiversitad e la qualitad da la cuntrada.